

МРТ ЖӘНЕ КТ КҮТУ УАҚЫТЫ ҚЫСҚАРДЫ

Қызылорда облысында 4 магнитті-резонансты томограф, 10 компьютерлік томограф бар. Олардың санының артуымен осы диагностикалық зерттеулерге кезек күту уақыты қысқарды, деп атап өтті медициналық ұйымдардың мамандары тілшілерге арналған баспасөз туры барысында. Ұйымдастырушы - Әлеуметтік медициналық сақтандыру қорының Қызылорда облысы бойынша филиалы.

Қала тұрғыны Ақсәуле Әшірбаеваның жүрегіне ашық ота жасалды. №1 емханада тіркілген жері бойынша жарты жыл сайын күндізгі стационарда емделіп, міндетті тексеруден – жүректің УДЗ-ден өтеді.

«2018 жылдан бері жүрек ауруы бойынша есепте тұрамын, 2 топтағы мүгедек. Емдеу, дәрі-дәрмек, диагностикалық тексерулер – осының барлығын дер кезінде, тегін алып тұрамын. Алғаш рет кардиологқа жүргізілгенде енгізумен жүру қиын болды. Қазір әл - ауқат жақсарды», – дейді Ақсәуле Әшірбаева.

Облыс орталығынан ең шалғайдағы Арал ауданының тұрғыны Гүлжахан Назарованың басы қатты ауырып, бас айналуы мазалайды. Себебін анықтау

үшін науқасқа МРТ зерттеуі тағайындалды. Жергілікті дәрігердің тиісті жолдамасымен Гүлжахан апа «INVIVO» клиникасына тегін тексеруге келді. «Жақында МРТ сараптамасы тағайындалды. Қан қысымының жоғарылауы, оттегінің жетіспеушілігі, бас ауруы мазалайды. МРТ зерттеуінің нәтижесі бір күннен кейін белгілі болады. Менің денсаулығымға қауіп төнбейді деп үміттенемін», – дейді Гүлжахан Назарова.

МРТ сараптамасын күту уақыты қысқарды, дейді клиника мамандары. Бұрын апталап кезек күтуге тура келсе, қазір 1-2 күн. МРТ диагностикалық тексеру құны 17 мың теңге. МӘМС аясында сақтандырылған азаматтарға – тегін.

«МРТ тексеруден өту үшін



тіркелген емхананың емдеуші дәрігерінің жолдамасы қажет. «INVIVO» клиникасы мен емхана арасындағы келісім-шарт негізінде пациент бұл қызметті ӨМСҚ қаражаты есебінен тегін алады. Күн сайын аймақтың 40-ка дейін, жыл сайын 10 мыңға жуық тұрғынын қабылдаймыз. Негізнен міндетті әлеуметтік медициналық сақтандыру аясында қызмет көрсетеміз», – дейді «INVIVO ВДП» ЖШС өңірлік директоры Қуат Төлешев.

2022 жылдың 9 айында облыстың 8 медициналық

ұйымы жалпы сомасы 168,2 млн теңгеге 14 588 КТ қызметін, 4 медициналық ұйым - 714,7 млн теңгеге 21 128 МРТ қызметін көрсетті, деп хабарлады Әлеуметтік медициналық сақтандыру қорының облыстық филиалының бас сарапшысы Айгүл Аханова. Биыл консультациялық-диагностикалық қызметтерді қаржыландыруға 13,2 млрд теңге қарастырылған, оның ішінде МӘМС бойынша – 11,4 млрд теңге.

«Ел тілегі» ақпарат

МӘМС МӘСЕЛЕЛЕРІ БОЙЫНША АҚПАРАТТЫҚ-ТҮСІНДІРУ ТОБЫ ҚЫЗЫЛОРДА ОБЛЫСЫНЫҢ ТҰРҒЫНДАРЫМЕН КЕЗДЕСУДЕ

Байқоңыр қаласында, Қазалы және Арал аудандарында МӘМС жүйесінде сақтандырылмаған азаматтар саны артты. Аталған елді мекендерде халықтың Әлеуметтік медициналық сақтандыру қоры (бұдан әрі – ӨМСҚ) филиалының, облыстық денсаулық сақтау басқармаларының, жұмысын қамту үйлестіру және әлеуметтік бағдарламалар басқармаларының, жергілікті атқарушы органдардың басшылығымен кездесулері өтті.

Байқоңыр қаласында ҚР-ның 13 мыңға жуық азаматы міндетті әлеуметтік медициналық сақтандыру жүйесінде сақтандырылмаған. Көбіне бір жыл ішінде төлем жасамаған тұрғындар. Сондай-ақ, МӘМС жүйесінен тыс Ресей Федерациясының ұйымдарында жұмыс істеген және РФ заңнамасына сәйкес зейнетке шыққан 3 мыңға жуық зейнеткер бар. Тісінше, аталған азаматтар жеңілдікті санатқа кірмейді және МӘМС журналдарын дербес төлеушілер ретінде төлейді, деп хабарлады кездесуде ӨМСҚ облыстық филиалының директоры Бақыт Исмаханбетов. Қазалы ауданында 11 мыңға жуық сақтандырылмаған азамат

бар. Осындай көрсеткіш Арал ауданында да. Бұл елді мекендерде тұрғындардың көпшілігі 12 ай ішінде МӘМС үшін төлем жасамады. Олардың қатарында жұмыспен қамту орталығында жұмыссыз ретінде тіркелмеген жұмыс істемейтін азаматтар да бар.

Бақыт Исмаханбетов атап өткендей, жұмыссыз ретінде тіркелген тұлғалар МӘМС журналдарын мемлекет төлейтін азаматтардың 15 жеңілдетілген санатының қатарына кіреді.

ӨМСҚ филиалы директорының айтуынша, облыста МӘМС жүйесінен тыс 130 мыңға жуық тұрғын бар, қызылордалықтардың 83% - ы сақтандырылған. Бұл деңгейді



85% - ға дейін көтеру міндеті қойылды. Мемлекет басшының тапсырмасы бойынша медициналық сақтандыру жүйесін жетілдіру мақсатында дербес төлеушілер үшін МӘМС-ке төлеудің баламалы тетігі - алдағы 12 ай үшін төлем жасауға болады. Ай сайын - 3 000 теңге. Бұл жыл бойына сақтандырылуға мүмкіндік береді. Төлемнің тағы бір тәсілі – бірінші жылдық төлем. Республикалық және облыстық маңызды қалаларда тұратын жеке тұлғалар үшін

БЖТ-дің мөлшері 2022 жылы 3 063 теңгені құрайды. Басқа елді мекендерде тұратындарға - 1 531,5 теңге. «Сақтандырылған» мәртебесі БЖТ тұрақты төлемдерінің үш айынан кейін беріледі.

МӘМС жүйесінің осы және басқа да ерекшеліктері азаматтарды қабылдау барысында толығырақ түсіндірілді. Ақпараттық-түсіндіру тобы Қармақшы, Жалағаш, Сырдария аудандарының тұрғындарымен кездесулерін жағастырды.

СУДЬЯ РЕСПУБЛИКАЛЫҚ ҒЫЛЫМИ-ТӘЖІРИБЕЛІК КОНФЕРЕНЦИЯҒА ҚАТЫСТЫ

Қызылорда облысының мамандандырылған ауданаралық әкімшілік сотының судьясы Зауре Жарылқасынова Қорқыт Ата атындағы Қызылорда Университетінде өткен «Заң. Әділдік. Теңдік сыбайлас жемқорлыққа қарсы мәдениетті қалыптастырудың негізі» тақырыбында өткен республикалық ғылыми-тәжірибелік конференцияға қатысты.

Шараның мақсаты Қазақстан сыбайлас жемқорлыққа қарсы бір сарынды іс-қимылдан қоғамдық сананы түбегейлі өзгертуге, халықтың сыбайлас жемқорлық пен неопозитивтік кез келген нысандарын қабылдамауына, алдын алу шараларының басымдығына көшуіне көзделді.

Конференция жұмысына ҚР Сыбайлас жемқорлыққа қарсы іс-қимыл агенттігі, Қызылорда облысы бойынша экономикалық тергеу-тексеру департаменті, облыстық индустриялық-инновациялық даму басқармасы мен Қызылорда облысының мамандандырылған ауданаралық әкімшілік соты өкілдері, Қорқыт Ата атындағы Қызылорда университетінің ғалымдары, профессор-оқытушылары, білім алушылар мен БАҚ өкілдері қатысты.

«Сыбайлас жемқорлықтың алдын алу жолдары» тақырыбында баяндама жасаған Қызылорда облысының мамандандырылған ауданаралық әкімшілік сотының судьясы З.Жарылқасынова, баяндама тақырыбын жан-жақты ашып, тақырыптың өзектілігіне көңіл аударды.

Ғылыми-тәжірибелік конференция барысында «Сыбайлас жемқорлыққа қарсы іс қимылдың жаңа тетіктері», «Қазіргі университеттің білім беру ортасы студенттің жеке тұлғасының сыбайлас жемқорлыққа қарсы бағытын қалыптастыру факторы ретінде», «Қаржылық сауаттылық пен қаржылық қауіпсіздік негіздері. Қаржылық алаяқтықтың қолданыстағы түрлері және олардан қорғану тәсілдері», «Сыбайлас жемқорлықтың негізгі себептері мен оның алдын алу жөніндегі шаралар» тақырыбында баяндамалар тыңдалып, талқыланды.

Шара соңында көтерілген тақырып аясында ұсынымдар қабылданды.

БІТІМГЕРШІЛІКТІҢ ТАМЫРЫ ТЕРЕҢДЕ

Соңғы жылдары елімізде дау шешудің озық жолы – бітімгершілік тәсілдерін жандандыруға айрықша көңіл бөлінуде. Бұл тұрғыда ҚР Жоғарғы Соты тарапынан «Соттағы татуластыру рәсімдері», «Татуласу: сотқа дейін, сотта» сынды, т.б. тың жобалар тәжірибеге енгізілді. Осы бастама аясында еліміздің барлық аумағында Татуласу орталықтары ашылды. Қазақстан соттарында татуластырушы судьялар іске кірісті.

Бұған қоса қолданыстағы Азаматтық процесілік кодекспен судьяға татуласу келісімін бекіту туралы өтінішхатты процесс барысында қарау мүмкіндігі берілді. Тағы бір өзгеріс, бүгінде дауды партиципативтік рәсімде шешуге адвокаттардан бөлек заң палаталарының мүшелері де қатыса алады. Бұрынғы кодексте тараптарды бес күн ішінде татуластыру керек болса, қазіргі күні бұл мерзім он күнге ұзарды. Мұның бәрі азаматтардың дауды өзара келісіммен бітірулеріне жан-жақты мүмкіндік береді.

Татуласу шаралары Азаматтық процесілік кодексте (АПК) көзделгендей, татуласу келісімі, медиация тәртібі, партиципативтік рәсім негізінде жүзеге асырылады. Сотқа жүгінушілер осы қағидалардың өздеріне тиімдісін тандап, дауды өзара келісіммен аяқтай алады.

Әр рәсімнің өз тәртібі бар. Аталған кодекстің 150-бабының талабына сай, судья алдымен талап қою арызын келіп түскен күннен бастап бес жұмыс күні ішінде соттың іс жүргізуіне қабылдау туралы мәселені шешеді. Дауды болдырмау мақсатында тараптарға татуласудың тиімділігін түсіндіреді. Сондай-ақ, олардың дауды өзара келісіммен бітірулері үшін процесілік барлық сатысында көмектеседі. Татуласу келісімі сот шешім шығаруға кетпей

тұрып және сот актісінің орындалуы кезінде жасалады. Бұл үшін тараптар дауды судья немесе медиатордың көмегімен реттеу туралы өтінішхатты мәлімдеулері тиіс.

Татуласу келісімін бекіту туралы өтінішхат сот отырысында қаралып, бекітіледі. Егер тараптар сот отырысына келмесе, сондай-ақ, өтінішхатты өздерінің қатысуынсыз қарау туралы арыз бермесе, татуласу келісімі қаралмайды. Татуласу келісімін жасаудың құқықтық салдары тараптарға өтінішхат бекітпей тұрып түсіндіріледі. Екі жақ та қолдаған жағдайда татуласу келісімін бекіту туралы ұйғарым шығарылады. Егер татуласу келісімі заңға қайшы болып, басқалардың құқықтары мен заңды мүдделерін бұзса бекітпейді.

Татуласу келісімі сот актісін орындау сатысында жасалса, актіні орындайтын аумақтағы немесе оны қабылдаған соттың бекітуіне жіберіледі. Келісім ерікті түрде орындалмаған жағдайда, бір тараптың өтінішхатымен соттың атқару парағының негізінде мәжбүрлеп орындауға жағдайы.

Медиативтік келісімге келу арқылы жүйкеге түсер салмақтан арылуға, уақыт жағынан ұтуға және қаржыны үнемдеуге болады. Сонымен бірге татуластыру процесі кезінде екеуара келісім құпиялығы сақталады, еріктілік принципі басшылыққа алынады. Азаматтар медиацияға сотқа дейін де, кейін де қолжеткізе алады. Дау-жанжалды өзара келісіммен бітірген екі жаққа да тиімді. Тараптар тіпті бір күн ішінде мәмілеге келе алады. Даулы мәселелерде бабалар жолы бітімгершілікті ұстанудан ұтпасақ, ұтылмаймыз.

Тимур РАИСОВ

БҰЛТАРТПАУ ШАРАЛАРЫН САҢҚИЯЛАУДЫҢ КЕЙБІР МӘСЕЛЕЛЕРІ

Сырдария аудандық сотында «Бұлтартпау шараларын саңқиялаудың кейбір мәселелері» тақырыбында дөңгелек үстел өткізілді.

Аталған іс шараға аудандық сот төрағасы Р.Алдамбергенов, Сырдария ауданының прокуроры Б.Жұмағали және аудандық полиция бөлімінің тергеу ісі жөніндегі орынбасары М.Алиев және тергеушілер қатысты.

Аудандық сот төрағасы Р.Алдамбергенов өз сөзінде, ҚПК-нің талаптарына сәйкес, күзетпен ұстау мерзімі нақты ұсталған кезден бастап есептеледі, осыған байланысты күзетпен ұстау түріндегі бұлтартпау шарасына санқия беру туралы қаулыда, осы мерзімді есептеудің басталу минутына дейінгі дәлдікпен, осы бұлтартпау шарасы саңқияланатын мерзім, осы мерзімнің аяқталу уақыты бір минутқа дейінгі дәлдікпен көрсетілуі тиіс екенін атап өтті.

Шара барысында заң бұзушылықтарға жол бермеу мақсатында Қазақстан Республикасы ҚПК-нің, сондай-ақ Жоғарғы Сотының «Бұлтартпау шараларын саңқиялаудың кейбір мәселелері туралы» нормативтік қаулысының талаптарын сақтау қажеттілігі туралы айтылды.

Сонымен қатар, бұлтартпау шарасының мерзімін ұзарту туралы өтінішхаттар келтіру кезінде құқық қорғау органдарының өкілдерімен жиі орын алатын кемшіліктерге тоқталды.

Шара соңында қатысушылар туындаған сұрақтары бойынша пікір алмасты.

БАҒДАРЛАМАШЫЛАР МАРАПАТТАЛДЫ

Елімізде 10 қараша «Цифрландыру және ақпараттық технологиялар қызметкерлерінің күні» деп белгіленді. Осыған орай, Соттар әкімшісінің басшысы Сүлеймен Сағатбек Болатбекұлы облыстық соттың Ақпараттық технологиялар және ақпараттық ресурстарды қорғау бөлімі мамандарын мерекелен құттықтап, жұмыстағы жетістіктері үшін құрмет грамотасымен марапаттады.

Жыны барысында басшы, соттардың қалыптасу жұмыс жасауы үшін, яғни әрбір жеке компьютер, оның қосалқы құрылғылары, сот процесіндегі аудио-бейне құрылғысының қалыптасу жұмыс жасауы аталған бөлім мамандарының тынымсыз еңбегінің нәтижесі екендігін айтып, сот жүйесін цифрландыруда олардың жұмысының маңыздылығына тоқталды.

Сонымен қатар, Соттар әкімшісі басшысының құрмет грамотасымен «INTEGRITY-A.A.» ЖШС-нің мамандары да марапатталды.

ӘКІМШІЛІК ҚҰҚЫҚ БҰЗУШЫЛЫҚ ТУРАЛЫ ЗАҢНАМА

Қызылорда қаласының әкімшілік құқық бұзушылықтар жөніндегі мамандандырылған сотының судьясы Г.Ульмира Искокова Қызылорда облысының бақылау жөніндегі басқармасында басқарма басшылары мен мамандарының қатысуымен семинар сабағын өткізді.

Іс-шараның басты мақсаты мемлекеттік қазметшілердің құқықтық мәдениет деңгейін арттыру, құқықтық сауаттылығын жоғарылату, әкімшілік құқық бұзушылықты реттейтін заңнаманы меңгеру болды.

Семинар барысында судья Г.Искокова қолданыстағы Әкімшілік құқық бұзушылық туралы кодексіне түсіндірме беріп өтті. Атап айтқанда, әкімшілік құқық бұзушылық істерді қозғау, рәсімдеу, сотқа жолдау тәртібі талқыланды. Сонымен қатар, сот жүйесіндегі істерді қарау барысында қолданылатын заманауи IT-технологиялар бойынша түсіндірме берілді.

Қатысушылар тақырып бойынша туындаған сұрақтарын қойып, өзара пікір алмасты.

ДАУДЫ СОТҚА ДЕЙІН РЕТТЕУДІҢ ЖАҢА ТЕТІГІ ТИІМДІ ІСКЕ АСУДА

Арал аудандық сотында бір жұмыс күнінің ішінде несие қарыздарын өндіру туралы үш талап қою тараптардың сотқа дейінгі хаттаманы толтыруы арқылы татуласуымен реттелді.

Татуластырушы-судья тараптармен әңгімелесу барысында, заңнамадағы дауды сотқа дейін реттеудің жаңа тетігі «сотқа дейінгі хаттама» жасау арқылы татуласудың тиімділігі мен салдарын түсіндіріп, татуластыру шараларын жүргізген.

Нәтижесінде тараптар дәлелдемелері мен дауды бейбіт жолмен реттеудің нұсқалары ұсынылған сотқа дейінгі хаттаманы жасау арқылы татуласып, дауды реттеу туралы келісімдер жасасқан. Оған сәйкес, талап қоюшылар жауапкерлердің материалдық жағдайын ескере отырып, берешек қарыздарын бөліп төлеулеріне мүмкіндік берген.

Сот ұйғарымдарымен дауды реттеу туралы келісімдер бекітіліп, іс жүргізу тоқтатылды.

Осылайша, аудандық сотта заңнамадағы татуластыру рәсімдерін қолдану саласын кеңейтетін «сотқа дейінгі хаттама» нормасы тиімді іске асуда.

ОБЛЫСТЫҚ СОТ СУДЬЯЛАРЫНА АЛҒЫС БІЛДІРІЛДІ

Қызылорда облыстық соты төрағасының атына Арал қаласының тұрғыны, жеті баланың анасы Данара Сисеновадан облыстық соттың азаматтық істер жөніндегі сот алқасының судьялары С.Жуынтаева, Ш.Маликова және Н.Өміртайұлына алғыс хат келіп түсті.

Алтын алқа иегері Д.Сисенова хатында, бір мекемеде 20 жыл еңбек өтілі бар өндірістік оқыту шебері екенін, балаларын өсіріп жеткізу мақсатында еңбек етіп келе жатқанын, асырауында мүгедек баласы барын жазған.

«Жұмыс берушінің бастамасымен атқарып отырған қызметім бойынша жұмыстан шығарылдым. Бұл шешіммен келіспей, аудандық сотқа жүгіндім, сот менің шағымымды қанағаттандырусыз қалдырып, облыстық сотқа шағымдандым. Менің шағымым жан-жақты талқыланып, талабым қанағаттандырылды. Істі қараған судьялар С.Жуынтаева, Ш.Маликова және Н.Өміртайұлына алғысым шексіз. Еңбектеріңізге жеміс, ардайым әділеттің шыңында әділ шешім тауып, халықтың ықыласы мен алғысына бөлене берулеріңізге тілектеспін» – дейді автор хатында.

СУДЬЯҒА АЛҒЫС БІЛДІРІЛДІ

Қала тұрғыны Алтынбек Мүсіреповтен Қызылорда қаласының әкімшілік құқық бұзушылықтар жөніндегі мамандандырылған сотының судьясы Сәуле Утегеноваға өз алғысын білдірген хат келді.

«Өзіме қатысты қозғалған әкімшілік құқық бұзушылық туралы істі қарау барысында судья өзін білікті заңгер, адат әрі әділ судья екендігін көрсетіп, істі жан-жақты объективті қарап, менің азаматтық құқықтарымың бұзылуының жолын кесіп әділ шешім шығарғаны үшін шын ризашылығымды, алғысымды білдіремін. Халық арасынан шыққан мен сияқты қарапайым адамның шыны ризашылығы ескерілсе екен» – деп хатын аяқтаған А.Мүсірепов, судьяның қызметіндегі қосқан үлесі үшін марапаттауды сұраған.

Атқарып келе жатқан қызметіне сәттілік, абырой, отбасына амандық тілеймін, деген автор хатында.

РЕСПУБЛИКА КҮНІН ҚАЙТАРУ – ЗОР МӘНГЕ ИЕ

Тарих – өткеннің жоқтаушысы, келешекке бағдар берер тамыршысы. Ұлт болып ұйысқан еліміздің тарихын тану, өткенін бағалау ұрпақтың басты парызы. Соның ішінде тәуелсіздікке қол жеткізуге көмектескен әр сәт, әр әрекет бағалы, ерекше құнды. Мызғымайтындай көрінегін Кеңестер одағының көбесінің сөгіліп, ынтымағының ыдырауына ықпал еткен желтоқсан оқиғасын біз ғана емес, бұрынғы туысқан елдердің бәрі есінде сақтары анық. Ал азаттықтың заңдық негізін қалауға жол ашқан «Қазак Кеңестік Социалистік Республикасының Мемлекеттік Егемендігі туралы» Декларацияның ел өміріндегі орны бөлек.

1990 жылы 25 қазанда Қазак КСР Жоғарғы Кеңесінің он екінші шақырылымында тарихи құжат қабылданды. Декларацияның қабылдануы жас мемлекеттің қалыптасуының заңдық алғышартына айналды. Бұл құжатты көріп, танысқандардың бойында жеке мемлекет, тәуелсіз ел болуға деген сенім пайда болды.

Декларация негізгі 17 тармақтардан құралған. Онда ең алдымен Қазақстан халқы Қазак КСР-індегі егемендіктің жалғыз иесі және мемлекеттік биліктің қайнар көзі деп жарияланды. Маңызды құжатта республиканың барлық азаматтары үшін лайықты және тең өмір сүру жағдайларын жасауға ұмтылыс жасалды. Сонымен бірге, экономикалық қауіпсіздікті қайнар көзі болып табылатын объектілердің қызметіне және жұмыстарына тыйым салатын экологиялық қауіпсіздік қағидаттарын негіздеді.

Бұған қоса, әрбір ел үшін басты ұстаным саналатын мемлекет тұтастығы мәселесіне айрықша мән берілді. Осылайша декларацияда Қазак КСР-інің аумағы бөлінбейтіні және қол сұғылмайтыны, оның келісімінсіз аумақты пайдалануға болмайтындығы жария етілді. Декларацияда ұлттық мемлекеттілікті қорғау және нығайту, төл мәдениетті, салт-дәстүрлерді, тілді жаңғырту мен дамыту және қазақ ұлтының, Қазақстанда тұратын басқа ұлттардың ұлттық қалпын-қасиетін нығайту мәселесі де негізгі шарттардың бірі ретінде дәйектелді. Дәл осы декларацияда мемлекеттік

билікті – заң шығарушы, атқарушы және сот билігі деп бөлу принциптері көпшілікке жария етілді.

Тәуелсіздікке жақындатқан Декларацияның құрметіне 25 қазан Республика күні болып бекітілгені белгілі. Алайда, 1992 жылдан бастап атаулы күндер қатарына енгізіліп, 2001–2009 жылдар аралығында мемлекеттік мереке ретінде тойланған бұл күн 2009 жылдан бері атаулы күндер қатарынан түсіп қалған болатын. Мемлекет басшысы Қ.Тоқаевтың Ұлытауда өткен Ұлттық құрылтайдағы ұсынысынан кейін республика күніне қатысты үлкен өзгерістер қолға алынды.

«Ұлттық мерекелер мен атаулы күндер тізбесіне бірқатар өзгерістер енгізіген жөн. Мен Республика күніне ұлттық мереке мәртебесін қайтаруды ұсынамын. Сондықтан қазанның 25 – Егеменді күнін еліміздің басты мерекесі ретінде атап өтуіміз керек. 1990 жылы 25 қазанда Қазақстанның егемендігі туралы Декларация қабылданды. Бұл еліміздің тәуелсіздік жолындағы тұңғыш қадамы болатын, – деп атап өтті Ұлттық құрылтайда Қасым-Жомарт Тоқаев.

Міне, биыл біз қайта оралған ұлық мерекені атап өттік. Республика күні – тәуелсіздіктің символы ретінде халықтың рухын көтеретін, ынтымағын нығайтатын, бір мақсатқа ұйығатын айтулы күнге айналына күмән жоқ.

**Талант ПЛЕП,
Қызылорда қалалық мамандандырылған тергеу сотының судьясы**

Рухани жеңіс – нағыз жеңіс

Қазір дауласып, уақыт пен қаражат жоғалтатын заман емес. Өз құқығыңды қорғау үшін заң мүмкіндіктерін тиімді пайдалана білу керек. Бұл өзгерістер елдегі көптеген маңызды мәселелерді оңтайлы шешіп, әлеуметтік-экономикалық дамуымызда үлкен жетістіктерге қол жеткізуге жол ашады. Қазак қоғамындағы сот процесінің басты мақсатының өзі бітімге келу, бітімгершілік болатын, яғни дауласушы немесе араздасушы тараптарды жұрт алдында бітімге келтіру. Бұл қазақ қоғамының өмірлік құқықтық қағидасы болды десек қателеспейміз. Өйткені, қазақ халқы үшін сотта жеңіп немесе жеңіліп шығу емес, рухани жеңілеп шығу қол жеткізілген әлдеқайда биік жеңіс деп танылған. Сондықтан бабалардан қалған бітімге келу мұрасының қазіргі таңда әлемдік үлгіге айналғаны біздер үшін мақтаныш. Енді сол сара жолды жаңғырттық, ал ары қарай дала заңы мен қала заңының арасындағы үйлесімділікті таба біліп, жүзеге асыру біздің парызымыз.

БІТІМГЕРШІЛІК ҮНТЫМАҚТЫ АРТТЫРАДЫ

Азаматтарды татуластыру дәстүрі бүгінде еліміздің сот жүйесінде дауларды сотқа дейін реттеу тәсілдерін арқылы жүзеге асырылууда. Татуласуға жататын даулар бойынша сотқа жүгінген азаматтарға алдымен татуластыру рәсімдеріне қатысу құқықтары түсіндіріледі. Тараптар татуласу келісімін, медиациялық келісім немесе партисипативтік келісімін жасап, дауды толық көлемде немесе бір бөлігі бойынша реттей алады.

Дауды бітімгершілікпен шешу азаматтардың уақытының үнемделуіне ықпал етіп, халық арасындағы дауласу деңгейін төмендетіп, адамдардың ымыраға келу мәдениетін қалыптастырады. Сондықтан, еліміздің сот жүйесі татуластыру рәсімдерін жетілдіруге кең көңіл бөлуде. Бұл жолдағы маңызды қадамдардың бірі – сотқа дейінгі хаттама институтын қолданғысы енгізу болып табылады. 2022 жылғы 1 қаңтардан бастап ҚР Азаматтық процесілік кодексіне енгізілген өзгерістер мен толықтырулар қолданысы еніп, сот жүйесінде сотқа дейінгі хаттама ұғымы пайда болды.

Сотқа дейінгі хаттама жасау арқылы дауды бітімгершілік, медиациялық және

партисипативтік келісімдермен реттеуге болады. Оның ерекшелігі, дау бойынша тараптар өзара дәлелдемелермен алмаса алады. Сонымен қатар, уақыт пен күшті үнемдеу, материалдық шығындардың болмауы және мемлекеттік бажды қайтару сотқа дейінгі хаттама жасаудың басты артықшылықтары болып табылады. Сайып келгенде, сотқа дейінгі хаттама дауды бітімгершілікпен аяқтауға және тараптардың бұрынғы қарым-қатынасын сақтап қалуға ықпал етеді.

Жаңа институтты жүзеге асыру тәсілдеріне келсек, татуластырушы-судья тараптарға сотқа дейінгі хаттаманы жасау жөніндегі құқықтарын түсіндіре отырып, татуластыру рәсімдеріне қатысуға шақыру жібереді. Сотқа дейінгі хаттама жасау арқылы татуласудың артықшылықтары мен салдарын түсіндіреді, тараптардың пікірін анықтайды. Егер тараптар сотқа дейінгі хаттаманы жасай отырып, татуласқан жағдайда, 15 жұмыс күнінен кешіктірмей, азаматтық іс қозғау және оны сот талқылауына дайындау туралы ұйғарым шығарады. Сонымен қатар, тараптардың арасындағы дауды бітімгершілікпен реттеу

НӘЗІК ЖАНДЫЛАРДЫҢ ҚҰҚЫҒЫ ТЕҢ

Ерлер мен әйелдер үшін тең құқық пен еркіндікті белгілейтін гендерлік саясаттың нәтижесінде әйелдер мемлекеттік органдарда, бизнесте, экономиканың барлық салаларында ер азаматтармен қатар еңбек етуде. Олар қабілет, дарынымен, іскерлігімен көзге түсіп қана қоймай, еліміздің кемел келешегіне өз үлестерін қосуда.

Өткен шаққа көз жүгіртсек, қазақ даласында Тәуелсіздік үшін күресте көзге түскен әйелдер аз болмаған. Ерлігімен қатар, даналығы аңыз болған бұдан екі жарым мың жыл бұрын өмір сүрген сақтың батыр қыздары Томирис және Заринаның аты тарихта қалды. Қыз-келіншектердің ерлігі дегенде жонғар шапқыншылығы тұсында Абылай хан дарабозым деп сыйлаған, қазақтың бас сардары, ұлы қолбасшысы Қабанбай батырдың жары Гауһардың тапқырлығын еске алсақ та жетеді. Қабанбай мен Гауһардан туған Назым қыздың небәрі 16 жасында Түркістан түбінде от шашқан жонғар зенбірегіне батпай, ұйлығысып қалған қазақ қолын бастап, найза орнына қолындағы қамшысын бұлап «Абылайлап» жауға шауып, жонғарларды түре қуған ерлігі ел есінде.

Кешегі Кеңесарының қарындасы Бопайдың ерлермен бірге өз елінің азаттығы үшін толарақтан саз кешіп, жасанған жаумен арыстанша айқасуы

не болмаса қазақ тарихында аққан жұлдыздай із қалдырған Шоқанның әжесі Айғаным ханымның елді ақылмен басқарғанын калай ұмытамыз? Мұның сыртында кешегі кеңес заманындағы соғыста шығыстың қос шынары атанған Мәңшүк пен Әлияның да ерлігі әлі есте. Міне осылайша қазақ даласындағы батыр апаларымызға қарап, сол дәуірдің өзінде ер мен әйелдің тең құқығы жөнінде жазылмаған дала заңы қалыптасқанын аңғаруға болады.

Ел егемендік алғаннан кейін мемлекетіміз әйелдер мәселесін жаңа заман талабына орай жанаша қырынан көрсете бастады. Нәтижесінде саяси, қоғамдық және экономикалық жағдайлардың ерекшелігі ескеріле отырып, 1998 жылы ҚР Президентінің жанынан – Отбасы және әйелдер ісі жөніндегі ұлттық комиссия құрылғаны белгілі. Оның негізгі міндеті – отбасына, әйелдер мен ерлердің теңдігіне қатысты кешенді мемлекеттік саясатты іске асыру екенін де айта

кеткен жөн.

Сонымен бірге, гендерлік саясат «Ерлер мен әйелдердің тең құқықтарының және тең мүмкіндіктерінің мемлекеттік кепілдіктері туралы» және «Тұрмыстық зорлық-зомбылық профилактикасы туралы» заңдармен реттеледі. Ол азаматтардың отбасылық-тұрмыстық қатынастар саласындағы заңдық мүдделері мен бостандықтарын, тұрмыстық зорлық-зомбылықтың алдын алу және жолын кесуде конституциялық құқықтарын қорғауға бағытталған.

Гендерлік саясат бойынша 2016 жылы Қазақстан Республикасында 2030 жылға дейінгі отбасылық және гендерлік саясат тұжырымдамасы бекітілді. Тұжырымдамада мемлекеттік гендерлік саясаттың мақсаты – ерлер мен әйелдердің қоғамның барлық салаларында тең құқықтарға, жеңілдіктерге, міндеттер мен мүмкіндіктерге қолжеткізуі, гендерлік кемсітушіліктің барлық нысандары мен көріністерін еңсеру көзделді. Соның жемісі болса керек, әйелдер қазанның айналасында емес, денсаулық сақтау, ағартушылық жүйенің, мемлекеттік қызметтің, сондай-ақ, бизнестің де құлағын ұстады. Соған қарамастан отбасының жарасымдылығына көп үлес қосып келеді.

Әйелдер мен ерлердің

билік құрылымдарына теңдей қатысуына қол жеткізу, экономикалық тәуелсіздіктің барлық тең мүмкіндіктерін қамтамасыз ету, өз бизнесін дамыту және қызмет бабында ігерілуі, отбасында құқықтар мен міндеттерді тең жүзеге асыру үшін жағдайлар жасау, жыныстық белгісі бойынша зорлықтан еркін болу гендерлік теңдіктің негізгі міндеті. Қоғамның дамуында әйелдердің рөлін бұдан әрі дамыту үшін жана мүмкіндіктер ашатын шешімдер және біздің мемлекетіміздің гендерлік саясаты, сонымен қатар, отбасы, әйелдер және балалар, әйелдердің жаңа ұрпақ тәрбиелеудегі рөлі мәселелері бойынша құқықтық база қалыптасты.

Көп жылдық тәжірибе көрсеткендей, гендерлік теңдік деңгейі жоғары болған сайын, отбасы мүшелерінің өздерінің тұрмыстық, экономикалық, адамгершілік-тәрбиелік, қорғаушылық және басқа да маңызды функцияларын орындаудағы жауапкершілігі, тепе-теңдігі мен нәтижесі жоғары болады. Осылайша, заманауи берік отбасының қалыптасуына жағдай жасау және гендерлік теңдікке қол жеткізу қоғамды әлеуметтік жаңғыртудың ажырамас процесі болып табылады.

**Тұрар ТЕМІРБАЕВ,
Қызылорда қалалық сотының судьясы**

БИЛЕРДІҢ ІСІ БІЗГЕ ҮЛГІ

Қазақтың заңға бағынғанына, құқықтық қағидаларды сақтағанына тарих қуа. «Қасым ханның қасқа жолы», «Есім ханның ескі жолы», «Әз-Тәукеңің Жеті Жарғысы» өз заманының заңдық жаршысы, халықтың сенімді қорғаны бола білді.

Осы құжаттардың барлығының дайындалуына хандар бастамашы болғанымен, заңның негізін жасаған билер екені даусыз шындық. Өйткені, халықтың жайын, елдің мәселесін ханнан гөрі, би жақсы біледі. Оны билерге жүктелер жауаптылықтың қаншалықты зор болғанына қарап бағамдау қиын емес. Билер адвокаттың да, прокурордың да, соттың да, медиатордың да рөлін қатар атқарған әмбебап адамдар. Бұған қоса, екі елді елестіру, мемлекет арасындағы мәселелерді шешудің де билерге тапсырылғаны баршамамызға белгілі.

Биге артылған жауаптылық қандай жоғары болса, оған көрсетілетін құрмет те сондай биік еді. Айналасына өзін мойындатқан, сөзін тыңдатқан билер кез келген дауды ақылмен, бітіммен шешкен. Биді сыйлағандықтан, бидің айтқан төрелігін мойындағандықтан айтылған кесім, берілген үкімнің орындалмайтын кезі болмайтын. Қазіргі судьялардың билер институтынан алар үлгісі мол.

Билер жолына, бітімгершілік үрдісінің маңызына сонғы жылдары ерекше мән берілуде.

Өйткені, бұл біздің құқықтық тарихымыз. Сонымен бірге, билер билігі қазақтың дауды бейбіт шешуге ниетті, ел бірлігін сақтауды басты орынға қойған ел екенінің дәлелі. «Медиация туралы» заңның қабылдануы билер институтын жаңғыртудың, елдегі дауекестікті азайтып, тараптар арасындағы татулықты сақтаудың ізгі қадамы десек қателеспейміз.

«Медиация туралы» заңның қолданысы енгізілуі қоғамға үлкен өзгеріс әкелді. Бұл заң ең алдымен билерге, билердің төрелік дәстүріне, сол арқылы қазақтың құқық аланындағы өзіндік қағидаларына деген құрметті арттырды. Соның нәтижесінде бірқатар қазақстандық ғалымдар бірегей билер соты туралы мәселені оқу орындарында зерттеумен шектеліп қоймай, көшпенділер өркениеті құқықтық жүйесінің жалпы мәдени құндылығын әлемдік қоғамдастыққа танытуға ұмтылды. Екіншіден, «Медиация туралы» заң елдегі дауекестікті төмендетуге, дауларды өзара бітіммен шешу мәдениетін қалыптастыруға игі ықпалын тигізді. Үшіншіден, заңның

қабылдануы ел арасындағы ақсақалдардың беделін көтеріп, ауыл ішіндегі келіспеушілікті өзара шешу арқылы сыйластықты, татулықты сақтаудың негізін қалады.

Жалпы, сөзі тасқа басылған, ісі көпке мұра болған билерден үйренеріміз өте көп. Қазақтың билер соты – бірегей сот жүйесінің іргетасы екені шындық. Сот жұмысын жандандыруда билер тәжірибесін зерделеу, билердің сөз сөйлеу, ой қорыту, көпшілікті ұйыту қасиеттерін үйрену аса маңызды. Бұл үшін әлемдік өркениет үдерісіндегі қазақ билер сотының рөлін, оның экономикалық, әлеуметтік, институционалдық аспектілерін, қазақ құқығының этноантропологиялық негізін әлі де терең зерттей түскен жөн.

Сонымен бірге, билер соты институтының қазақстандық қоғамның мемлекеттілігі мен құқықтық мәдениетін қалыптастырудағы орнына баға берген абзал. Шыңдығында қазақтың Төле, Қазыбек, Әйтеке секілді ұлы даналары бізге бай рухани мұра қалдырды. Билер соты қазақ қоғамында топтастырушы рөл атқарып, мемлекеттің маңызды институты, тіпті оның тірегі болды. Бұл мемлекетті сақтаудың, қазақ көшпенділерінің бірлігін қамтамасыз етудің қуатты факторына айналды.

Билер соты институты жоғары моральдық сот

ретінде іргелі қағидаттарға негізделді. Атап айтқанда, бидің сатылмайтындығы, әділеттілік, шешімдерінің мөні мен моральдық бағыты, бидің көпшіліктің мен жариялығы, шешендік өнерді меңгеруі, тараптарды татуластыру және құқық бұзушылық салдарынан келтірілген залалды толық өтеуі дала сотының өзіндік ерекшелігі мен әлеуетін білдіреді. Билер сотының тағы атап көрсетерлік айқын белгілерінің бірі оның рухани бағытты ұстанатындығында екенін айтақан жөн. Өйткені, билер қараған даулардың рухани мазмұны әрдайым басым болды. Билер билік жүргізу кезінде ең алдымен қоғамда қалыптасқан моральдық көзқарастарды ұстануға тырысты.

Қазір осы билер институтын насихаттап, маңызды көтеру бағытында ауқымды шаралар қолға алынууда. Мұндай игі істердің басында сот жүйесі мен судьялардың тұрғаны белгілі. Судьялар билер институтының өткені мен болашағына қатысты халықтың танымын көтеруде, билерді дәріптеу, насихаттау жұмыстарында көш басында жүр. Әділетті үш биге арналған ескерткіштердің әр сот ғимаратынан орын алуының өзі сот саласының билерге деген жоғары құрметінің белгісі болса керек.

**Д.ЕРА.ПІЕВ,
Сырдария аудандық сотының судьясы**



Телжан ЖҮСПӨВ,

